

D'Chötti

Autor(en): **Balzli, Ernst**

Objektyp: **Article**

Zeitschrift: **Die Berner Woche**

Band (Jahr): **34 (1944)**

Heft 53

PDF erstellt am: **27.04.2024**

Persistenter Link: <https://doi.org/10.5169/seals-649872>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

D'Chötti

E Wiehnachtsgschicht vom Ernst Balzli

Der Herr Brächrüehl het ufe gluegt a ds Bahnhofzyt u nachhär der Vorstand agräblet:

«Allem a het er wider Verspätig?»

«Ja, öppis wenigs — vier Minute!»

«Nid meh? Nu, de geits no i ds Mäas. Es isch mängisch scho schlimmer gsy i de letschte Jahre.»

Der Vorstand het gnickt u die grüeni Chelle näb syr Bürotüren abghängt: «Zuegäh. Der Chrieg het is üse Fahrplan scho meh weder einisch umgmödelet. — Syt er öpper erwarte?»

«Ja, i muess öpper abhole — es Französli.»

«Dir säget! Es Feriechind?»

«Nei — e chlyne Flüchtling. Verwichen einisch hei sie im Radio brichtet, es syg wieder e tolli Tschuppele yne cho, zwüsche drü- u viertuusig. Ungfelligerwys het my Frou das grad ghört — sie lost süsch d'Nachrichte sälten oder nie — u nachhär isch sie uf mi z'dorf cho. Sie het a mer ume ghäret u patteret, mir wölle eis näh, bis i bi murbe gsy u schliesslich ja gseit ha.»

«Trotzdam sie viel öppe nid zwäg isch?»

«Ja, äbe! Aber was han i wölle! Sie het mer so lang vo Chrischtepflicht u Möntschlichkeit gredneret, dass i z'letscht ha müessen i dä suur Öpfel bysse. U jetz soll es also cho, mit em Drüzug.»

«Es Meiteli?»

«Ja, es elfjährgs Burgunderli, us der Nööchi vo Dijon oder so.»

«Das wär us ere Gäget wo der Chrieg nid allzu grüselig ghuset het?»

«Nei, der egetlech Chrieg nid, aber...» Der Herr Brächrüehl het untereinisch hübschlicher gredt. «Was nachhär cho isch, das isch vom Übel gsy. Hütt jedefalls isch däm Meiteli sys Dorf z'Bode brönnit, u Mannevolch gäbs dert so guet wie keis meh...»

«O jeh!»

«Derzue isch ds ganz Land usghunget un usgsugget, d'Lüt lyde brandschwarze Hunger, ömel die wo nid jede Rank und Schlich wüsse für öppis z'ergattere... u drum het jetz ds Rote Chrüz ygriffen u wenigstens afe d'Göfli us däm Eländ use gno.»

«U Dir heit ech ou für eis gmäldet?»

«D'Frou! D'Frou, nid ig! I vo mir us hätt Saches gnue gha am eigete Gvicht.»

«Aber wieso müesst jetz Dirs cho abhole?»

«Wäge der Sprach. Teel Lüt chöi drum bloss Französisch we ne niemer Wältsches ebchunnt. U derzue si vori no grad öppis Chunden i ds Lädeli cho u hei se versuunt. Überhaupt — öppis areise cha sie albe scho; hingäge wes de an e Notchnopf geit...»

Hie het der Herr Brächrüehl müessen abchlepfen. Drinnen im Stationsbüro het ds Telephon tschäderet, der Vorstand het «Excuse!» gseit, rächtsumkehrt gmacht un isch yne gsprunge s ga abnäh. U nes Ougeblickli speter isch der Drüzug ygfahren u het still gha. Viel Lüt si nid usgstige. Herrried isch es chlys Näschtli u het nid der Huufe Verchehr. Der eint oder ander Zug chönnt mängisch überhaupt düreschnütze; es begährt niemer usz'stygen u niemer wott verreise.

Der Herr Brächrüehl het der Chopf ufgha u scharf nach sym Französli usgluegt. Es Momänteli het er scho gloubt, es syg nid cho un er heig e Narregang gmacht — da gseht er bim zweit-hinterschte Wage d'Tür ufgha. Schön, de cha mes also ga in Epfang näh. Wie heisst jetz neue scho ds erschte Sätzli wo me für ihns parat het?... «Bonjour, ma petite! Tu as fait un bon voyage?»

Aber... was isch jetz das? Öppis stimmt da nid! Das Meiteli wo da zur Tür uschunnt isch keis elfjährgs Töchterli. Das isch no ganz es chlys Stüdeli, eis, wo ziemli sicher no nid emal i d'Schuel geit... U hinter ihm dry... was isch ächt das für ne Kumedi!... hinter ihm dry chunnt es zwöits, eis vo der Grössi ungfähr wie ds Meiteli... jetz e Bueb, vilicht e Zwöit- oder Drittklässler... jetz wider es Meitschi, wahrschynlich ds agmäl-deten em Alter nah... no eis, öppen es Dryzähjährgs... also föifi im ganze!

Em Herr Brächrüehl isch sys schöne Sätzli Wälsch im Hals blybe stecke. Er het einisch z'läärem müesse schlücke. Heiligs Verdien... das wärde doch nid alls Französli sy?...

Wohl, es macht d'Gattig. Sie tragen alli föifi es blaus Bérét, wie's däne z'Frankrych vielnen Orte Moden isch — un ume Hals hanget ne an ere Schnuer es wysses Schildli mit em rote Chrüz druffe...

U jetz stygt gar no e sächsti Pärson us, e jungi, nätti Frou i der Schwösteretracht. I der einte Hand het sie es Göferli, i der andere es Japaner-Reischörbli. Dert drinne wärde d'Sache sy vo dene föifi Göfli, d'Wösch u d'Wächtigschleidl...

Der erscht Ougeblick isch der Herr Brächrüehl gsy wie vor e Chopf tätscht. Es isch ihm nüt Guets ertroumet, weiss Gott nid. Irget er inneri Stimm het ihm zueghüschet, da syg nid alls chouscher, er heigi öppis wie ne böse Konflikt vorstünds.

Zum Glück ischs e churze Chlupf gsy. No grad z'rächter Zyt chunnt ihm z'Sinn: «Tue nid dumm! Bisch äbe nid der einzig im Dorf wo so nes Französli zue sich nimmt. Ander Lüt wärde sich o gmäldet ha. I wett also nid uf Vorrat chummere!»

Immerhin isch er froh gsy, wo ändtliche der Vorstand sy grüeni Chelle gschlängget het u der Zug wieder abfahren isch. Weiss der Gagger, gob süsch nid no meh so chlyni Ruschtig usgstige wär!

Guraschierte het er jetze ds Härz i beid Händ gno un isch uf d'Schwöschter los. Die isch vo ihre föif Burschli zueche gstande, het ds Göferli u der Japaner linggs u rächts abgestellt gha u allem a der Ougeblick nid rächt gwüsst was vurnäh. — Notabeni d'Burschli: Die hei sich alli föifi d'Händ gäh un e solidi, hebli Chötti gmacht. Vo naachem agluegt, hei sie grüensi verschochen usgseh, sogar ds eltische, ds Dryzähjährgs. Manierlige het sich der Herr Brächrüehl vorgstellt: er wär jetz also der Spezereihändler vo Herrried u wett gärn sys Französli cho abhole, ds Yvonne Frossard. Er nähmi a, da ds dritte sygs, das magere Bleichmüsl!

D'Schwöster het gnickt: Ja, das syg ds Yvonne — es liebs Meiteli, was sie afe gmerkt heig. U die zwöi Chlyne da u der Bueb... u ds grössere, ds Jacqueline... gob ihm nüt uffalli a dene vierne?

Nei, wyter nid, het der Herr Brächrüehl gmacht. Heisst das... mi chönnt bal meine, ds ganz Chüppeli wär Gschwüschtert oder ömel süsch Verwandti... jedefalls ds Gsühn heigi sie ds glyche.

«Ja...», het d'Schwöschter chli duuchi zuegäh. «Es si Gschwüschtert, alli füfi. Und jetz, Herr Brächrüehl, muess ig ech öppis z'wüsse tue wo mer ordeli schwär uffliegt. I weiss nämlech nid, won i mit ne hi soll. Ussert am Yvonne isch keis vo ne hie z'Herrried agmälde.»

Wär wotts em Herr Brächrüehl verargge, dass er uf dä Bricht abe bleiche worden isch, fasch chli missfärbige? U dass er ohni z'wölle eifach e Schritt hindertsi drus isch?

«Jä...», stagget er äntlige — «wieso bringet er se de glych da häre?» «Das will ig Euch gärn erkläre, Herr Brächrüehl. Lueget se numen einisch a, die füfi. Gseht er, wie sie enand a de Händ heig? Wie d'Chläblüus hange sie zäme! Das isch scho uf der ganze Reis eso gsy, vo Gänf bis uf Bärn u jetz da aben uf Herrried. Nid einisch hei sie enand losglah. Warum, das weiss i nid — ihri Muetter muess se so brichtet ha. Jedefalls het es hütt z'Mittag z'Bärn innen es fürchterlichs Gschärei gäh, wo me se het wölle usenand näh für sen uf die agmälde Familie z'veteile. Die zwöi Chlyne da hei gfürhörnlet, es het dür die halbi Stadt us tönt; der Bueb het brüelet wie we me ne am Mässer hätt; ds Yvonne het brav gsekundiert, u ds Jacqueline het sich mit Zähn u Fingernegel afah wehre, wo men ihm die Chlyne het wölle furt näh. I der Bahnhofhalle si d'Lüt scharewys zämegloffe u hei wölle wüsse, was da gspilt wärdi. Natürlich het es sofort bissigi Sprüch afah rägne, wo sie gmerkt hei, um was es geit. Churz u guet — mir sy schliesslich froh gsy d'Chötti schön ganz z'lah für däm Ufruehr es Änd z'mache!»

Der Herr Brächrüehl het sich no nid hert bhymet gha.

«Aber... wieso bringet er se jetz da abe?», het er verstörte gfragt. «Wieso? Will mer is gseit hei, uf em Land usse, im

ene chlyne Dorf, verliere sie enand minder us den Ouge, u da chönn me se wahrschynlich de scho usenand näh. U de hei mer für sicher agnoh, hie z'Herrried gäb es scho zwo drei Familie wo das ungfellige Tschüppeli ohni länzi Amäldig bhalti! «I weiss nid — i weiss wahrhaftig nid!» het der Herr Brächrüehli gmuderet. Nachhär isch er uf e Vorstand z'dorf, wo sich underdessi wider het zueche glah gha. «Oder was meint Dir?» «Die paar Gofli da? Bhüetis wohl, für die findt me scho nes Huli un en Unterschlupf!»

«So so! Bi wäm de zum Byspiel?» «O — das isch um ds Frage z'tue. Eis chöit er ömel afe grad bi mir lah.»

«Ischs mögli?» isch d'Schwöster ufgjuckt. «Das wär allerdings e gueten Afang! Weles hättet er am liebschte?»

«Chunnt nid druf ab — mir isch jedes rächt. Immerhin will i grad no hurti d'Frou ga frage. Chömet sider i Wartsaal — gseht er, es faht wider a schneie.»

Natürlich isch d'Frou Vorstand der erscht Ougeblick nid grad begeischtet gsy vo der Zuemuetig, wo me da so vo eir Minuten uf die anderi a se gstellt het; aber wo sie die fuf Burschli het gseh stah dunten im nüechtliche Wartsaal, schüüch u muussig u vergütterlet — da het si nid lang Gschichte gmacht: ds Chlynschte nähm sie — für das heig sie scho Platz, u zwar am Tisch un i der Schlafstube.

«Danken ech vielmal!» het d'Schwöster gseit u Vorstands chreftig d'Hand gschüttlet. Nachhär het sie sich abe bückt zum Chlynschten i der Füferreihe us an es Ärveli gno: «Ecoute, Violette — est-ce que tu veux rester chez Madame?» Vo unten ufe het se ds Meiteli zwo Sekunde lang agluegt mit grosse, beerischwarzen Ouge — nachhär het es ds Chöpfli gschüttlet u churz gseit: «Non!»

«Non? Mais je te dis, Madame est très aimable; elle aime beaucoup les enfants et tu te trouveras très bien chez elle...»

«Non!» het ds Chlyne wieder gmacht u dezidiert sys Ploueli gschüttlet. Mi het ihm agseh, da treit alls Chüderlen u Chrättele nüt ab. Der Schwöster het es scho wider afah Angscht mache; sie het öppis gseh cho... U richtig, wo sie nach zäh Minute Zuereden und Büüssele ds Jüngschte het gno bim Handelsi us het wöllen use brächen us der Chötti, da ischs losgange: vierstimmig, i de höchste Tönen u fortissimo... Nume ds Eltschte het nid mitbrüelet; aber derfür het es sich hinter die Gschwüschterte gstellt, beid Armen um se glyret un Ouge gmacht, wo schier gar ds Fütür drus gsprätzlet het. Wohl oder übel het d'Schwöster ds Chlyne wider losglah u der Rückzug aträtte. Ratlosen isch sich der Herr Brächrüehli dür ds Haar gfahre. «Jetzt begryffen i, dass z'Bärn obe d'Lüt zäme gloffe sy!» het er gemeint. «Das isch ja us em Tierbuech use!»

«Ja, tatsächlech!» het ihm der Vorstand Byfall gäh. «Warum tüe sie ächt so unvernünftig?»

«I weiss ou nid sicher», het d'Schwöster hübscheli gseit. «Aber... vilicht hei sie ou scho ihrer Erfahrig gmacht. Es isch i ihrem Dörfli schynt paarmal vorcho, dass Familie vertromet worde sy... u nachhär enand nie meh gfunde hei.»

Nadinah het es wider chli gstillt; aber die fuf Französi si misstreu bliben u hei zämegha wie glymet u gchittet. E Blinde het müesse gseh, dass sich die Chötti nid laht bräche.

«Was mache?» het schliesslich d'Frou Vorstand gfragt.

«Da gits leider nimme viel z'wärweise!» het d'Schwöster gsüüfzet. «I muess se wider mit mer yne näh uf Bärn. Wenn fahrt der nächst Zug?» «Viertel ab föifi!»

«Nei, das gits nid!» het sich der Herr Brächrüehli ygmischlet. «Wenn i keis Gofli mit mer hei bringe, überchumen i Sirach mit der Frou, u das wett i lieber nid... Ds Yvonne jedeffals isch mir zuegsproche; uf das verzichten i nid!»


«Aber Dir heit ja gseh, Herr Brächrüehli...»

«Ja, i ha gseh... u ghört o! — Wes nid anders geit, nimen ig halt alli föifi, punktum!»

«Herr Brächrüehli!» «Es isch mer Ärnscht. Mi cha die arme Tschudeli nid lenger la i der Wält ume wägele wie nes Trybetli Veh... Ecoute, mes enfants: vous resterez ensemble, et vous viendrez avec moi, tous les cinq; Compris?»

Das isch echli grobhölzigs Wätsch gsy, ömel was d'Ussprach anbelangt; aber d'Französi hei ne glych verstande. Der Ton halt — da het viel usgmacht. Es het e keis vo ne nei gseit, u nes churzes Rüngli speter isch der Herr Brächrüehli mit der Rotchrüzschwöster u sym fufchöpfige Schärli dür ds Dorf us gvoyagiert, sym Spezereilädeli zue.

Natürlich isch d'Frou Brächrüehli der erscht Ougeblick erschlüpf, wo re statt emen einzige Meiteli so ne tolli Chuppelen isch cho i ds Huus z'schneie. I müesst lüge, wenn i ds Gägeteil wetti bhauptete. Aber wo se der Ma het bschuelet gha, mit



Eine neue Serie von 10 Photo-Aufnahmen „Bern im Schnee“ von H. von Allmen ist auf Weihnachten als Postkarten herausgekommen. Die vorzüglichen Bilder, vor allem unserer Altstadt, wovon 8 Nachtaufnahmen sind, eignen sich ganz besonders gut zu Neujahrsglückwünschen.

paarne churze, klare Worte — da isch bi ihre sofort usdischpiert gsy. Sie het gmacht was die meischte Frouen i settige Fäll: Der Verstand gschweigget u nume no ds Härz la rede. U das het no besser Französisch chönne weder ihre Ma, viel besser. D'Ussprach bsunderbar isch guet gsy; a dere het es nid ds gringschte gäh z'rämple...

Vor allererscht het sie dene Französi afe z'Aben ufgschteilt — e Wätschafe voll Kakao un e brave Vierpfünder. Am liebschte hätt sie ne natürlich Milch ygschänkt; aber der Momänt het sie nid gnue im Huus gha, u mits im halbe Tag het sie niene chönne ga reiche. Mit em Zucker het sie nid bruuche z'gyte — schliesslich het sie nid vergäben es Spezereilädeli gfuehrt... Die Burschli hei Ouge gmacht, wo sie jedem vo ne zwöi Bitzli i ds Chacheli pletscht het! Zucker hei sie chuun meh em Name nah kennt. Bim Treiche het me ne du nid hert müesse zue spräche; wo sie der Kakao einisch hei versuecht gha, hei sie nachhär d'Näsi töif i d'Chacheli gestreckt, paarmal chreftig zoge — u die lääre Tassli wider abgestellt.

«Wohl, der Appetit isch rächt!» het der Herr Brächrüehli erchennt u jedem e zwöiti Schybe Brot abghoue.

Nadinah si die chlyne Gescht es bitzeli uftouet. Ds gröschte, ds Jacqueline het ganz manierlig Bscheid gäh we men ihns öppis fragt het, u die zwöi Jüngschte hei scho albeneinisch d'Chöpfli zämegstreckt u öppis gha z'güele. Der Rotchrüzschwöschter het es süüferli afah liechte.

«I gloube doch i dörf se da lah!» het sie nach em z'Aben gemeint. «Dass der nid Möntscheffrasser syt, hei sie jetzt gmerkt, u vilicht vergeit ne d'Misstreu ni grad einisch!»

«I hoffes ou!» het d'Frou Brächrüehli gnickt. «Mit der Zyt wärde sie de scho der Chnopf uftue!»

Das het sie fräveli dörfen anäh; aber der Ougeblick het es no nid grad d'Gattig gmacht. Wo sich d'Schwöster chli speter wider agleit het für z'verreise, het sich ds Zwöitjüngschte by re zuecheglah u re Neuis i ds Ohr gchüschet. Zur Frou Brächrüehli het es si no nid zueche trouet. D'Schwöschter het glachet un ihm der Arm um d'Achsle gleit:

«Mais oui! Viens avec moi!»

Das hätt sie ringer nid gseit. Wie uf Kommando si die andere vieri ufgschosse, hei enand d'Händ gäh u wider d'Chötti gmacht. U ds Jacqueline het innert ere Sekunden ume syner heisse, gfährlichen Ougen übercho. Es het nüt gnützt, dass ne d'Schwöschter längs u breits erklärt het, sie sölli doch i der Stube blybe, ds Claudine müessi bloss hurti veruse gah nes chlys Gschäfteli bsorge... Ds ganz Tschüppeli isch mit u het nachhär dusse vor em Töri mit em Milchglasschybli gwartet, bis die Staatsaffäre isch erlediget gsy.

Im Lädeli het sälben Abe der Herr Brächrüehli aleini müesse bediene; sy Frou het wäger nid derwyl gha. Bis für die fuf Gofli

alls isch ygrichtet u zwäg gchrätetlet gsy — das het öppis gmanglet! Ds Jacqueline het ere hie und da nes bitzli ghand-langeret, aber nume wenn es nid vo den andere furt müesse het. So gwüss, dass ihns d'Frou Brärbüehl einisch het wölle zur Stuben us lööke, het es grad Churzschluss gäh. De hei sie d'Chötti gmacht u d'Sireneli ygstellt für losz'lah.

Bi den achten ume het es no hurti glängt für ne churze Grossalarm. Da isch es Zyt gsy für i ds Huli, ömel afe für die beide Jüngschte, u d'Frou Brärbüehl het se wölle untere tue. Aber oha lätz! Es hätt scho fasch e Ladig Schwarzpulver bruucht, für die fünf Burschli usenand z'spränge, so hei sie zäme gha. U ds Brüel!... Gstillt het es ersch wider, wo d'Pflegetere mit vereinte Chrefte hei zwöi Bett i die hinteri Stube züglet gha u dert die ganz Gsellschaft isch ypackt u versorget gsy.

I de nächschte Tage hei die fünf Französli z'Herrered viel z'brichte gäh. D'Wiehnachten isch vor der Tür gstande, un i Brärbüehls Lädli het ds Lütli es Tags mäns hundert Mal geschället. Bsunderbar d'Froue vom Dörfli hei e Huufe gha z'chrämere, u bi der Glägeheit hei sie de albe die frönde Vögeli chly gschouet. Mängi het d'Frou Brärbüehl beduuret, da heig sie sich öppis ufghalset. Föifi uf ei Chlapf — das sy ja nid zum Säge! Gob sie nid doch wett probiere, ds eint oder ds andere nes Huus wyters z'gäh? Meh weder eini het sich anerbotte, sie wöll scho eis näh, gärn sogar! U Brärbüehls wäre bereit gsy, vilicht zwöi oder drü abz'trätte, scho wägem Geschäft twäge, wo i dene Tage z'tüe gäh het wie nie — aber d'Chötti z'brächen isch eifach nid mügli gsy. Die het gha, besser weder ds bescht Schmidye.

Bi allne mögliche Glägeheite het si das zeigt. We ds Jacqueline i d'Hütte müesse het ga d'Milch reiche — die vier andere si mitzotlet. Wo der René bim Schuhmacher es Paar Holzbödeli het dörfe gah aprobiere — dieser vieri si-n-ihm nid vo der Syte gangen u hei nachhär natürlich ou grad jedes es Paar Trögel übercho. Bim Zahnarzt si sie z'füfi höch im Wartzimmer ghocket, wo ds Yvonne e böse Zahn het müesse ga la zieh. Schlittle hei sie ersch chönne, wo Brärbüehls e bravi Füßplätzergybe hei zueche ta gha; uf zwee Schlittle hätte sie sich um kei Prys la vertelle. Churz u guet — so mänge Scheidewegge dass men asetzt het, es het e keine wölle bysse.

Am meischte het es Vorstands duuret, dass sie keis Glied hei chönnen abspränge vo der Chötti. Ihne het ds Jüngschte bsunderbar i d'Ouge gstoche gha, ds Violette. Das isch aber o nes Schatzibönni gsy mit syne glänzige Chruseli u de beerischwarzen Ouge. Sie hei alls möglichs agwängt fürs uf irget en Art u Wäg u Wys i d'Finger z'übercho — aber bätet het nüt. E paarmal het es sich la ylade von ne, het es Tassli Milch mit Hungg gschlühelet u derzue nes halb Dotze vo den erschte Wiehnachtsgüezi gmöffelet — u die vier andere hei-n-ihm derby ghulfe. Z'letscht het es vielmal danket, härzig, wies numen es chlys Französli cha... u nachhär isch es mit de Gschwüschterte wider heizue gstöffelet, zu Brärbüehls.

So isch schliesslich der vierezwänzgischt Christmonet cho, der Heiligabe. Im Spezerellädli het me wyter nüt dervo gha weder no einisch es Gjang un es Gspräng un e tolli Ruffete. D'Frou Brärbüehl isch afe ganz massleidig gsy, dass sie nid ou derzue cho isch chli öppis zwäg z'mache für d'Burschli, bsunders wo die geng flyssiger hei afah brichte vom arbre de Noël, von ere crèche u vom petit Jésus. Bi de füfen ume isch d'Frou Vorstand no hurti i ds Lädli cho, het zwöi Druckli Cherzli kouft un es halb Dotze Silberfäde — u het nachhär fasch echli im Verbygang gfragt, wenn dass Brärbüehls im Sinn heigi ds Böimli z'ha?

«Morn z'Abe!» het d'Chrämersfrou Bscheid gäh. «Hinecht chöme mer nid derzue — mir müesse ds Lädli z'lang offe ha.»

«Dörfe sie i däm Fall hinecht zu üs cho?»

D'Frou Brärbüehl het der Chopf gäh ufgha. Es dezidierts «Nei!» isch ere scho z'vorderscht uf der Zunge gsy. Das macht me doch nid, dass me d'Chind vorewägg zu frönde Lüten a ds Böimli schickt. Z'ersch fyret men i der eigete Familie, punktum!... Aber sie het ihres Nei verschluckt. I den Ouge vo der andere Frou isch öppis gsy — es Bättle, es Aaha — öppis, wo eim dür u dür gangen isch... Der Frou Brärbüehl isch es wie ne chalte Tschuder über ds Härz gschosse. «Sie het nie eigeit Chind gha...» het sie untereinisch müesse sinne. «U het doch so blangt nach eme Butzli... mäns Jahr lang, bis sie schliesslech d'Hoffnig het la fahre. Da wärs nid rächt, we d'jetze tätisch nei säge. Du darfscht nid verböischtig sy!»

Fasch ohni z'wölle het sie gnickt: «Vo mir us — warum nid! Es schadt ne dänk nüt, wenn sie nach soviel Chrieg u Jammer

hüür zwöi Böimle dörfe luege. Nume — tüt mer se de nid z'hert verwöhne!»

«Nei, heit nid Chümmer — mir makes bescheide... Un i danken ech vielmal, Frou Brärbüehl!»

«Nüt z'danke! — Also, i will se de na'm z'Nacht schicke. Hingäge, wenn se wider zrügg reiche, das chan i no nid säge!»

Sie het Wort ghalte. Öppis na de sibne het sie ihrer Französli la springe — alli guet ygmummelet, statt de Bérés ne warmi, glismeti Chappen über d'Ohren ab. Am liebschte wär sie grad mit ne, aber ds Lädli u d'Huushaltig heis no nid erloubt. Vom overschte Stägetritt us het sie ne no nes Rüngli nache gluegt, wo sie uf der frösch verschneite Strass der Station zue gwydlet sy. Prezys wie am erschte Tag hei sie enand fescht a de Hände gha; es het d'Gättig gmacht, d'Chötti syg no geng so heblig u solid wie dennzamal.

«Chläblüt!» het d'Frou Brärbüehl hübscheli glachet — nachhär isch sie i ds Huus zrügg, no einisch für nes Stündli ga Wiehnachtscherzli, Stärnlispöier, Silberfäden u settigs Züüg verchoufe.

Was am sälben Heiligaben alls gangen isch bi Vorstands, das hei Brärbüehls nie gnau chönnen erfahre. Wo sie bi de nüünen ume abe cho sy uf d'Station, isch scho alls verrichtet gsy, u was ne speter d'Französi brichtet hei, da drus isch kei Möntsch klug worde.

Dass öppis passiert isch, het d'Frou Brärbüehl scho der glych Ougeblick gwüss, wo sie bi Vorstands der Fuess über d'Schwelle vo der Wohnstube gsetzt het. Für seien isch d'Frag bloss gsy: Was hets gäh? — Chöit mer lang, Froue hei für settigs es apartigs Gspüri...

Der Wiehnachtsboum isch ime ne Stubenegge gstande, es schöns, fählerloses Tanngrötzli. Brönn het er nimme z'grächtem; bloss es halb Dotze Cherzestümpeli hei no zuckt u glämmlet. Drum ume si die vier eltere Französli gruppet u hei sich mit ihrne Gschänkli vertörlet — ds Jacqueline mit eme Buech, der René mit eme Mécano; ds Yvonne u ds Claudine hei zämethaft es Würfelspiel gmacht.

U ds Violette, ds Jüngschte?

Das isch bi der Frou Vorstand gsy, het sich la schössele u het derzue sälber es grosses, schöns Schlafbäbi buttelet. Eso vertrout het es ta, wie wenn es sit Jahr und Tag hie daheime wär.

Wo Brärbüehls zur Tür y chöme, het ihns d'Frou Vorstand feschter an es Ärveli gno. Und ihres erschte Wort isch gsy:

«Frou Brärbüehl — d'Chötti het la gah!»

«D'Chötti? — Es wird öppe nid sy!»

«Wohl. Lueget — u loset!»

Sie het sich abe bückt zum Meiteli, töif u in eren Art, wies numen e Muetter fertig bringt:

«Ecoute, ma petite... est-ce que tu veux rester chez moi?»

Ds Violette het si nid lang bsunne; härzhaft het es gnickt:

«Oui, je veux rester!»

«Vraiment?»

«Oui!»

«Et tu dormiras chez nous ce soir?»

E Blick uf ds Bäbi. — e zwöiten i ds Gsicht vo der Frou Vorstand — u nachhär isch es zum dritte Mal cho:

«... Oui — je dormirai chez vous.»

Der Frou Brärbüehl isch e churze, gäjie Stich dür ds Härz gfahre. So ring het sich das chlyne Strupfli vo ihre losgseit u vo syne Gschwüschterte... wäge me Schlafbäbi twäge?...

Aber wie gseit, es isch numen e churze Stich gsy. Lenger weder zwo, drei Sekunde het er nid gschmirzt. We me der Frou Vorstand i d'Ouge gluegt het, isch eim d'Yversucht vergange. Da isch eim sofort klar worde, dass sie ds Violette nid bloss mit em Schlafbäbi zue sich glöckt het — dass da no ganz ander Mächt im Spiel si gsy...

D'Wienacht? — Ja, d'Wiehnacht — die ganz Wunderchraft vo däm Abe. Nume die het so öppis fertig bracht.

Wo d'Frou Brärbüehl das het begriffe gha, het sie nimme viel Wort gmacht. Sie het eifach der Frou Vorstand d'Hand greckt u re zuegnickt. Aber ou uf ihrem Gsicht isch vo sälbem Ougeblick a ne warme Schyn gläge, e Schyn, wo vo innen use cho isch.

E halb Stund speter hei d'Französi müesse zäme packen u Guetnacht säge. Nid alli — bloss die vier eltere. Ds Violette isch bi Vorstands bliben u het sich dert unter nes grosses, rotghüselets Dachbett la versorge.

Keis Müxli hei sie gmacht bim Adiesäge — keis Tröpfli Ougewasser isch grünelet. D'Frou Vorstand het rächt gha — d'Chötti isch abendand gsy.